

MONJE BENEDETINU sira MARTIR iha TIBHIRINE (Algeria)

Durante tinan 1990, iha Algeria, hahú funu entre maun-alin: grupo radikál islam nian kontra militar governu nian, no iha nasaun tomak violénsia sai maka'as (maizumenus ema sura katak, iha tempu ne'ebá, mate ema algerinu 150.000 no martir sarani 19 no entre sira iha monje benedetinu na'in 7; ema algerinu ne'ebé lakon karik 20.000).

Iha loron 30 outubru 1993, GIA (grupu islamista ho kilat) fó ultimatum ba ema estranjeiru sira atu husik Algeria, tan ne'e, misionariu barak husik nasaun Algeria. Iha loron 8 maiu 1994, sira hahú oho relijiozu no amlulik sira ne'ebé sei hela.

Iha Tibhirine, knua ki'ik iha Foho "Atlante" ho ema musulmanu de'it, monje benedetinu na'in 7 hari'i sira-nia comunidade no, tuir S. Bentu nia regra "Ora et labora", sira servisu iha to'os no mós servisu mediku ba povu (iha sira leet iha fr. Luc, dottor ida) eh reza. Maski relijiaun la hanesan, relasaun ho povu di'ak de'it, sira respeita malu, tulun malu iha buat hotu.

Iha momentu ne'ebé fundamentalizmu terorista sai maka'as, governu hakarak fó protesau militar, maibé monje sira la simu tanba sira la koho hadook an husi povu. Kalan ida, grupu ida ho kilat tama iha uma hodi husu ba monje sira atu kura sira-nia membru na'in rua ho kanek, maibé monje sira la bele fó aimoruk ba sira tanba aimoruk uitoan de'it no ba povu ki'ak. Husi momentu ida ne'ebá situasaun sai todan liu ba sira tanba povu ki'ik de'it tau matan ba sira: governu no GIA buka de'it atu halo sira sai husi Algeria.

Kalan entre 26 no 27 marsu 1996, grupu ho ema na'in 20 deskoñesidu ho arma, tama iha monje nia uma no lori sira. Fulan ida liu tiha, grupu GIA nia xefe fó hatene katak sira hakarak troka monje sira ho ema algerinu terorista dadur iha Fransa. Tanba laiha resposta husi Fransa, liu tiha fulan ida tan, GIA komunika katak sira ko'a ona monje sira nia kakorok. Liu tiha loron 9 ema sira konsege atu hetan monje sira nia ulun. De fatu, maski fofufoun ema hotu hanoin katak GIA mak oho sira, iha investigasaun ne'ebé ema independente ruma halo, parese katak militar sira envolve iha asaun ida ne'e.

Filme

Rejista Xavier Beauvois foti inspirasaun husi monje sira nia istória la'ós atu apresenta film "polisia nian", maibé liuliu hakarak hatudu monje sira nia moris loron-loron nian, fiar, esperansa no karidade



ne'ebé halo sira hakotu atu hela no fó sasin kona-ba Maromak. Tan ne'e, nia husu ba aktor sira atu halo retiru loron ruma molok hahú filme iha monje sira nia konventu, atu bele komprende uitoan sentimentu sira ne'ebé book sira, no situasaun iha ne'ebé sira moris.

Durante filme, rejista fó tempu barak atu hatudu oinsá monje sira ne'e hakotu atu hela hamutuk ho povu, ida-idak nia motivasaun ne'ebé la hanesan, no halo ita komprende katak, desizaun ezijente sira husu mai ita atu kompromete an. Timor oan ruma ne'ebé haree filem ida ne'e hateten katak aspetu ida ne'e parese hanesan ba buat ne'ebé mosu iha 1999, bainhira ema (liuliu relijiozu no amlulik sira) tenke decide se hela ka ba.

Pergunta ruma

- ◇ Aspetu ida ne'ebé mak dada liu imi-nia atensaun?
- ◇ Se fasil atu dehan katak monje sira ne'e moris iha fiar no karidade, hahalok ka liafuan hirak ne'ebé halo imi hanoin katak sira-nia esperansa maka'as tebes?
- ◇ Iha filme ida ne'e, karakteristikida ida importante mak orasaun: koko atu haree oinsá monje sira nia orasaun tulun sira atu hala'o sira-nia moris no dever no oinsá akontesimentu sira influénsia sira-nia orasaun. Imi-nia orasaun no relasaun ho Maromak presiza hadi'ak saida atu bele sai "kuaze" hanesan?

Pe. Christian de Chergé, superior iha comunidade Tibhirine nian, iha tinan 1993, hodi haree situasaun ne'ebé mosu iha Algeria, hakerek ninia testamentu; tuir mai bele lee parte ruma:

Se loron ida (karik ohin kedas), ha'u sai terorista sira nia buat karan, tanba sira oho iha ne'e ema estranjeiru hotu, hau hakarak hateten ba hau-nia comunidade, kreda, família, katak hau saran hau-nia moris ba Maromak no ba nasaun ida ne'e, katak Mestre úniku iha hau nia moris mos hetan mate brutal. Ha'u husu atu sira reza ba ha'u.... iha momentu ida ne'ebá ha'u hein katak ha'u bele konxiente atu husu Maromak no maun-alin sira nia perdaun no mós atu perdua ho fuan tomak ida ne'ebé sei oho ha'u... hau sei la kontente katak ema sira ne'e nebé ha'u hadomi hetan akuzasaun tanba ha'u-nia mate ... Ba ha'u nasaun ida ne'e no Islam mak buat seluk. sira mak isin no klamar. Depois ha'u mate, ema balun sei hanaran ha'u nu'udar beik, ka idealista, maibé sira tenke hatene katak ha'u-nia hakarak boot ida sei hetan satisfasaun: tama kle'an iha Aman nia hamatan no hamutuk ho Nia hau sei kontempla ninia oan Islam sira hotu ... Ha'u agradece Na'i ba ha'u-nia moris ne'ebé ha'u lakon, tanba Nia hakarak atu haraik Ninia ksolok. Iha agradesimentu ida ne'e, ha'u inklui imi, ha'u-nia belun sira horseik no agora nian,... no mós ba ó, belun momentu ikus nian, ne'ebé loloos la hatene ó atu halo saida. Sim, ba ó mós hau hato'o ha'u-nia obrigado no a-deus ne'ebé ó prepara ona mai ha'u. Ha'u hein katak ita hotu, na'okten di'ak sira, sei hasoru malu iha Lalehan, se ne'e mak Maromak nia hakarak, ne'ebé ita hotu nia Aman. Amen! Insc'Allah